

Jemal Le Grand y Jordy Groters

Den Campeonato Division 1 na USA

ALABAMA, MERCA - Nos landadonan studiante na Estados Unidos, esta Jemal Le Grand y Jordy Groters, e ultimo dos siman a participa den Campeonato di e diferente Conferencianan den Division 1.

Den fin di siman tras di lomba a tuma luga e Campeonato di e Conferencia South Eastern Conference SEC na Auburn, Alabama cu participacion di scolnan fuerte manera University of Florida, Auburn, Tennessee y Georgia.

E atleta Jordy Groters a wordo selecta pa scol University of Missouri pa participa den 3 evento individual na e Campeonato aki. Jordy a cuminsa su competencia e prome dia cu 50 liber na unda el a logra landa su miho tempo 20.07, sorpresa su mes pa



cualifica pa final C y tambe wordo selecta pa ta den e 4 x 50 liber estafette. Den e competencia di estafette, Jordy a landa pa prome biah a un 19.91. Su ekipo a yega na di 6 luga cu tempo B pa Campeonato Nacional na luna di maart. Hopi contento Jordy a sigui e Campeonato cu presentacion den 100 y 200 Schoolslag. Jordy a logra yega final C den ambos y den 100 a logra landa otro tempo personal record 54.19.

Den 100 Jordy a touch muraya prome como e ganado di e Final C, asina yuda su scol cu mas punto. Tur 3 di su evento individual Jordy tin tempo B pa e Campeonato Nacional NCAA division 1, pero awor lo mester warda si su temponan ta suficiente lihe pa wordo selecta pa bay competi na Iowa City, Iowa dianan 26-28 di Maart proximo.

Jemal su scol, Florida State



University ta participa den e Atlantic Coast Conference ACC, di cual su Campeonato a tuma luga na Georgia Tech na Atlanta, Georgia. Den ACC scolnan fuerte den deporte di landamento ta Georgia Tech, North Carolina State, University of North Carolina y Louisville. Jemal a wordo selecta pa representa su scol den 50, 100 y 200 Freestyle y tambe Jemal a wordo scogi pa ta den e 4 x 200 F Liber estafette. Jemal a cuminsa e campeonato e prome dia cu su estafette na unda nan termina na di 8 luga. Pa score 44 punto pa su scol. Individual Jemal a landa temponan cerca di su miho tempo pero no por a yega cualifica pa final nan. Den 50 Liber, Jemal a finalisa na 51 posicion cu 20.83, den 100 Liber na di 48 luga cu 45.46 y den 200 Liber na di 37 luga cu 1:39.14. Pa Jemal tambe lo tin chens di bay competi na e Campeonato Nacional na IOWA den e 4 x 200 es-

tafette, si su scol lo wordo selecta.

E temporada di Universidad y Colegio ta termina despues di e Campeonato Nacional na IOWA y lo cuminsa bek luna di Augustus. Division 1 ta asina competitivo cu tur e universidadnan di nivel halto ta sigui entrena nan landadonan durante en lunanan di April pa Augustus. Ambos Jordy y Jemal ta den preparacion pa representa Aruba durante e Weganan Pan Americano 2015 na Toronto. □

